

四庫全書

史部

欽定四庫全書

欽定續通志卷二百二十八

列傳

唐 二十八

魏元忠

韋安石

陟 絙

斌 抗

叔夏

郭元振

魏元忠宋州宋城人為太學生跌蕩少檢久不調整屋
人江融曉兵術元忠從之游盡傳所學儀鳳中吐蕃數

盜邊元忠上封事洛陽宮言命將用兵之要曰天下之柄有二文武而已至制勝御人其道一也今言武者先騎射而不稽之以權略言文者首篇章而不取之以經綸養由基射能穿札不止鄢陵之奔陸機識能辨亡無救河橋之敗本末之效斷可知矣夫才生于世世實須才何世而不生才何才而不資世故物有不求未有無物之歲士有不用未有無士之時漢拜韓信舉軍驚笑蜀用魏延羣臣缺望此富貴者易為善貧賤者難為功

也昔漢文帝時魏尚李廣並身任邊將位為郡守夫以李廣才氣天下無雙爾時胡騎馮陵足申其用而文帝不能大任反歎其生不逢時削魏尚之爵而罰作之乃速想廉頗李牧此身為時主所知而不得盡其才也晉羊祜獻計平吳賈充荀勗沮之祜歎曰天下事不如意十常七八緣荀賈不同竟不大舉此位據立功之地而不獲展其志也況布衣韋帶之人懷竒抱策上書闕下望朝奏而夕召豈易得哉臣願歷訪文武五品以上得

無有智如羊祜武如李廣而不得騁其才略者乎使各
言其志毋令久失職又曰語有之人無常俗政有治亂
軍無常勝將有能否由此觀之安邊境立功名在於良
將也且上智下愚明暗異等多算少謀衆寡殊科故魏
用柏直以拒漢韓信輕為豎子燕任慕容評以抗秦王
猛謂之奴才今朝廷用人類取將門子弟亦有死事之
家而蒙抽擢者此等本非幹略若之何使當閫外之任
哉且建功者言其所濟不言所起言其所能不言所藉

若陳湯呂蒙馬隆孟觀悉出貧賤而勲伐甚高不聞其
家世將帥也故陰陽不和擢士為相蠻貊不龔拔卒為
將今以四海之廣億兆之衆其中豈無卓越奇絕之士
臣恐未之思也夫何遠之有又曰賞者禮之基罰者刑
之本禮崇謀夫竭其能賞厚義士輕其死刑正君子勗
其心罰重小人懲其過賞罰者軍國之綱紀政教之樂
石吐蕃本非勍敵而薛仁貴郭待封至棄甲喪師脫身
以免國家寬政罪止削除網漏吞舟何以過此雖陛下

遲念舊恩顧收後效然朝廷所少豈此一二人乎夫賞
不勸謂之止善罰不懲謂之縱惡臣誠疏賤干非其事
豈欲間陛下君臣生薄厚哉正以刑賞一虧百年不復
今罰既不行賞復難信故議者皆謂比日征行虛立賞
格而無其實良由中才之人不識大體恐賚勲庸竭府
庫留意錐刀以為益國所謂惜毫釐失千里者也自燕
定方平遼東李勣破平壤賞既不行勲亦淹滯歲月紛
淆真偽相錯臣以吏不奉法慢自京師偽勲所由主司

之過其則不遠近在尚書省中然未聞斬一臺郎戮一
令吏使天下聞知陛下何照遠而不照近哉神州化首
文昌政本治亂攸在臣故冒死而言夫明鑑所以照形
往事所以知今臣請借近以為諭貞觀中萬年尉司馬
玄景舞文邀利棄之都市後征高麗總管張君又擊賊
不進斬之旗下臣以為偽勲之罪多於玄景仁貴等敗
重於君又向使早誅仁貴待封則諸將豈敢失利
於後哉慈父多敗子嚴家無格虜此言雖小可以喻大

又今之將吏率多貪暴所務惟徇馬財物無趙奢吳起散
金養士之風以此行軍臣恐戎狄之平未可旦夕望也又
師行必藉馬力不數十萬不足與虜爭臣請天下自王
公及齊人挂藉之口人稅百錢又弛天下馬禁使民得
乘大馬不為數限官籍其凡勿使得隱不三年人間畜
馬可五十萬即詔州縣以所稅口錢市之若王師大舉
一朝可用且虜以騎為彊若一切使人乘之則市取其
良以益中國使得漸耗亦國家之利也高宗善之授秘

書省正字直中書省仗內供奉遷監察御史帝嘗從容
曰外以朕為何如主對曰周成康漢文景也然則有遺
恨乎曰有之王義方一世豪英而死草萊議者謂陛下
不能用賢帝曰我適用之聞其死顧已無及元忠曰劉
藏器行副於才陛下所知今七十為尚書郎徒歎彼而
又棄此帝默然慙文明年遷殿中侍御史徐敬業舉兵
詔元忠監李孝逸軍至臨淮而偏將雷仁智軍敗孝逸
懼其鋒未敢前元忠曰公以宗室將天下安危所繫且

海內承平日久聞狂狡竊發皆注心傾耳以待其誅今
軍不進使遠近解情萬一朝廷以他將代公將何辭以
逃逗撓之罪孝逸然之乃部分進討時敬業保下阿谿
弟敬猷屯淮陰咸請先擊下阿下阿敗淮陰自破今淮
陰急敬業必救是腹背受敵也元忠曰不然賊勁兵盡
守下阿利在一決萬一失捷則大事去矣敬猷博徒不
知戰且兵寡易搖大軍臨之其勢必克既克敬猷乘勝
而進彼引救不及又恐我之直擣江都必邀我於中路

吾乃以逸擊勞破之必矣譬之逐獸弱者先禽今捨必禽之弱而趨難敵之強非計也孝逸乃引兵擊淮陰敬猷脫身遁遂進擊敬業平之還授司刑正遷洛陽令陷周興獄當死以平楊楚功得流歲餘為御史中丞復為來俊臣所構將就刑神色不動前死者宗室子三十餘尸相枕藉元忠顧曰大丈夫行居此矣俄敕鳳閣舍人王隱客馳騎免死傳聲及于市諸囚歡呼元忠獨堅坐左右命起元忠曰未知實否既而隱客至宣詔已乃徐

謝亦不改容流費州復為中丞歲餘陷侯思止獄仍放
嶺南酷吏誅人多訟元忠者乃召復舊官因侍宴武后
曰卿累負謗鑠何耶對曰臣猶鹿也羅織之吏如獵者
苟須臣肉為羹耳彼將殺臣以求進臣顧何辜聖恩二
年為鳳閣侍郎同鳳閣鸞臺平章事俄檢校并州長史
天兵軍大總管以備突厥遷左肅政臺御史大夫兼檢
校洛州長史治號威明張易之家奴暴百姓橫甚元忠
笞殺之權豪憚服俄為隴右諸軍大使以討吐蕃又為

靈武道行軍大總管禦突厥元忠馭軍持重雖無赫然
功而亦未嘗敗中宗在東宮為檢校左庶子時二張勢
傾朝廷元忠嘗奏曰臣承先帝之顧且受陛下厚恩不
能徇忠使小人在君側臣之罪也易之等恨怒因武后
不豫即共譖元忠與司禮丞高戢謀挾太子令天下遂
下制獄詔皇太子相王及宰相引元忠等廷辯不能決
昌宗乃引張說為證說初偽許之至是迫使言狀不應
后又促之說曰臣不聞也易之等遽曰說與同逆說曩

嘗謂元忠為伊周夫伊尹放太甲周公攝王位此反狀明甚說曰易之昌宗安知伊周臣乃能知之伊尹周公歷古以為忠臣陛下用宰相不遣學伊周將何效焉且臣豈不知附易之立取台衡附元忠立致滅族但懼元忠之寃不敢面欺耳后寤其譏然重違易之故貶元忠高要尉中宗復位召為衛尉卿同中書門下三品不閱旬遷兵部尚書進侍中武后崩帝居喪軍國事委元忠裁可拜中書令封齊國公神龍二年為尚書右僕射知

兵部尚書當朝用事羣臣莫敢望謁告上冢詔宰相諸
司長官祖道上東門賜錦袍給千騎四人侍賜銀千兩
元忠到家於親戚無所賑施及還帝為幸白馬寺迎勞
之安樂公主私請廢太子求為皇太女帝以問元忠元
忠曰公主而為皇太女駙馬都尉當何名主恚曰山東
木彊安知禮阿母子尚為天子我何嫌宮中謂武后為
阿母子故主稱之元忠固稱不可乃止武三思用事韋
月將高軫上書言其惡帝撈殺之後莫敢言王同皎謀

誅三思不克反被族元忠居其間依違無所建明初元忠相武后有清正名天下傾望冀幹正王室武后之崩也三思矯遺制慰諭之賜實封百戶元忠捧制感咽涕泗見者曰事去矣至是譽望大減陳郡男子袁楚客者

通鑑作
酸東肘

以書規之曰主上新服厥命維新厥德當進君

子退小人以興大化豈可安其榮寵循默而已今不早建太子擇師傅而輔之一失也公主開府置僚屬二失也崇長緇衣使遊走權門借勢納賂三失也俳優小人

盜竊品秩四失也有司選進賢才皆以貨取勢求五失也寵進宦者殆滿千人為長亂之階六失也王公貴戚賞賜無度競為侈靡七失也廣置員外官傷財害民八失也先朝宮女得自便居外出入無禁交通請謁九失也左道之人熒惑主聽盜竊祿位十失也凡此十失君侯不正誰與正之哉元忠得書益慙

謹按通鑑輯覽

叩批元忠素負重望頗能不為利害動心乃自嶺表召還頓改前轍捧制威咽時名節掃地蓋不待酸棗尉責以十失已知其無能為矣行百里者半九十里晚節可不慎哉以三思權專思有以誅之會

節愍太子起兵與聞其謀太子已誅三思引兵走闕下
元忠子太僕少卿昇過於永安門太子脅使從戰已而
被殺議者未辨逆順元忠誦言曰既誅賊謝天下雖死
鼎鑊所甘心惟皇太子沒為恨耳帝以其嘗有功且為
高宗武后素所禮置不問宗楚客紀處訥大怒固請夷
其族不聽元忠不自安上政事及國封詔以特進齊國
公致仕朝朔望楚客等引姚廷筠為御史中丞暴奏反
狀由是貶渠州司馬楊再思李嶠皆傳致元忠罪唯蕭

至忠議當申宥之楚客復遣再思與冉祖雍奏元忠緣
逆不宜處內地監察御史袁守一固請行誅遂貶務川
尉守一又劾天后當不豫狄仁傑請陛下監國元忠止
之此其逆久萌帝謂楊再思曰事君者當一其心豈有
主上小疾遽請太子知事者朕未見元忠過也元忠至
涪陵卒年七十餘景龍四年贈尚書左僕射齊國公本
州刺史睿宗詔陪葬定陵以實封一百五十戶賜其子
晃開元六年諡曰貞元忠始名真宰以諸生見高宗高

宗慰遣不知謝即出儀舉自安帝目送之謂薛元超曰
是子未習朝廷儀然名不虛意謂是真宰相也避武后
母諱改今名

韋安石京兆萬年人曾祖孝寬為周大司空鄴國公祖
津大業末為民部侍郎與元文都等留守洛拒李密戰
上東門為密禽密敗復歸洛世充平高祖素與津善授
諫議大夫檢校黃門侍郎陵州刺史卒父琬仕為成州
刺史安石舉明經調乾封尉永昌元年遷雍州司兵參

軍蘇良嗣當國謂安石曰大才當大用徒勞州縣可乎
薦于武后擢膳部員外郎遷并州司馬有善政后手制
勞問陟拜德鄭二州刺史安石性方重不苟言笑其政
尚清嚴吏民尊畏久視中遷文昌右丞以鸞臺侍郎同
鳳閣鸞臺平章事兼太子左庶子仍侍讀尋知納言事
時二張及武三思寵橫安石數折辱之會侍宴殿中易
之引蜀商宋霸子等博塞后前安石跪奏商等賤類不
當戲殿上顧左右引出坐皆失色后以安石辭正改容

慰勉鳳閣侍郎陸元方自以為不及退告人曰韋公真宰相后嘗幸興泰宮議趨疾道安石曰此道板築所成非自然之固千金子且誠垂堂况萬乘可輕乘危哉后為回輦長安二年同鳳閣鸞臺三品俄又知納言檢校揚州大都督府長史神龍元年罷政事俄復同三品遷中書令兼相王府長史封鄮國公賜封三百戶加特進為侍中中宗與韋后以正月望夜幸其第賚賜不貲帝嘗幸安樂公主池主請御船安石曰御輕舟乘不測非

帝王事乃止睿宗立授太子少保改封郾國復為侍中
中書令進開府儀同三司太平公主有異謀欲引安石
數因其壻唐暎邀之拒不往帝一日召安石曰朝廷傾
心東宮卿胡不察對曰太子仁孝天下所稱且有大功
陛下今安得亡國語此必太平公主計也帝矍然曰卿
勿言朕知之主竊聞乃構搆變欲訊之賴郭元振保護
免遷尚書右僕射兼太子賓客同三品俄罷政事留守
東都會妻薛怨婿婢笞殺之為御史中丞楊茂謙所劾

下遷蒲州刺史徙青州安石在蒲太常卿姜皎有所請
拒之皎弟晦為中丞以安石昔相中宗受遺制而宗楚
客韋溫擅削相王輔政語安石無所建正諷侍御史洪
子輿劾舉子輿以更赦不從監察御史郭震奏之有詔
與韋嗣立趙彥昭等皆貶安石為沔州別駕皎又奏安
石護作定陵有所盜沒詔籍其贓安石歎曰祇須我死
乃已發憤卒年六十四開元十七年贈蒲州刺史天寶
初加贈左僕射郇國公諡文貞二子陟斌

陟字殷卿與弟斌俱秀敏神龍二年安石為中書令陟甫十歲授溫王府東閣祭酒朝散大夫善文辭書有楷法一時知名士皆與游開元中居喪以父不得志歿乃與斌杜門不出八年親友更往敦曉乃強調為洛陽令宋璟見陟歎曰盛德遺範盡在是矣累除吏部郎中中書令張九齡引為舍人與孫逖梁涉並司書命時號得才遷禮部侍郎陟於鑒裁尤長故事主司取人以一日試為高下陟詐自通所工先就其能試之已乃程考由

是無遺材遷吏部侍郎選人多偽集與正調相冒陟風
采嚴正擿辨無不首伏每歲黜正數百員號為精敏自
以才地可坐階三公居常簡貴視僚黨警然其以道誼
合雖後進布衣與均禮李林甫忌之出為襄陽太守徙
河南採訪使以判官員錫善訊覆支使韋元甫上書奏
時號員推韋狀陟皆倚任之俄襲郾國公坐事貶守鍾
離義陽後為河東太守兼本道採訪使以失職內快快
頗餉謝權倖欲自結天寶十二載入考華清宮楊國忠

惡其才望諷拾遺吳豸之使發陟罪豸之乃劾陟饋遺
事國忠又使韋元忠左驗陟惶悸賂吉溫求揀由是俱

得罪陟貶桂嶺尉

按通鑑以此為十三載事蓋陟以十
二載詣行在而貶官則在明年也

再貶平樂會安祿山陷洛陽弟斌沒賊國忠欲構陟與
賊通密諭守吏令脅陟使憂死州豪傑共說曰昔張說
被竄匿陳氏以免今若詔書下誰敢庇公願公乘扁州
遁去事寧乃出不亦美乎陟慨然曰命當爾其敢逃刑
因堅卧不出歲餘肅宗即位起為吳郡太守會永王兵

起委陟招諭乃授御史大夫江東節度使與高適來瑒
會安州陟為載書登壇誓衆辭旨慷慨士皆隕泣永王
敗帝趣陟赴鳳翔初季廣琛從永王亂非其本謀陟表
廣琛為歷陽太守慰安之至是恐廣琛有後變乃馳往
慰諭而後赴徵帝雅聞陟名欲倚以相及是遷延疑有
顧望意止除御史大夫會杜甫上表論房琯詞意迂慢
帝令陟與崔光遠顏真卿按之陟奏甫言雖狂不失諫
臣體帝繇是疏之將軍王去榮殺其本縣令帝將宥之

陟又以為不可時朝臣著位不肅班殿中有相弔哭者
帝以陟不任職用顏真卿代之更拜吏部尚書久之宗
人伐墓柏坐不相教貶絳州刺史還授太常卿呂誼入
輔薦為禮部尚書東京留守史思明逼伊洛李光弼議
守河陽陟率東京官屬入關避之詔授吏部尚書就保
永樂不許至京卒年六十五贈荊州大都督陟早有名
而為林甫國忠擯廢及肅宗擇相自謂必得以後至不
用鬱鬱不得志疾且卒歎曰吾道窮於此乎性侈縱喜

飾服馬侍兒閹童列左右常數十侔於王宮主第窮治饌羞擇膏腴地藝穀麥以烏羽擇米每食視庖中所棄其直猶不減萬錢宴公侯家雖極水陸曾不下筋常以五采牋為書記使侍妾主之陟惟署名自謂所書陟字若五朵雲時號郇公五雲體永泰元年贈尚書左僕射太常博士程皓議諡忠孝顏真卿以為許國養親不兩立不當合二行為諡主客員外郎歸崇敬亦駁正之右僕射郭英乂卒用常議云

斌父為相時授太常通事舍人少修整好文藝容止嚴
峭有大臣體與陟齊名開元中薛王業以女妻之遷祕
書丞天寶中為中書舍人兼集賢院學士改太常少卿
李林甫搆韋堅獄斌以宗累貶巴陵太守移臨汝久之
拜銀青光祿大夫列五品時陟守河東而從兄由為右
金吾衛將軍紹為太子少師四第同時列戟衣冠罕比
者祿山陷洛陽斌為賊得署以黃門侍郎憂憤卒乾元
元年贈祕書監斌天性質厚每朝會不敢離立笑言嘗

大雪在廷者皆振裾更立斌不徙足雪甚幾至韞亦不
失恭子況少隱王屋山孔述審稱之及述審以諫議大
夫召薦況為右拾遺不拜未幾以起居郎召半歲輒棄
官去從家龍門除司封員外郎稱疾固辭元和初授諫
議大夫勉諭到職數月乞骸骨以太子左庶子致仕卒
況雖世貴而志沖遠不為聲利所遷當時重其風操

叔夏安石兄通禮家學擢明經第歷太常博士高宗崩
卹禮亡缺叔夏與中書舍人賈大隱博士裴守真議定

其制擢春官員外郎武后拜洛享明堂凡所沿改皆叔
夏祝欽明郭山憚等所裁討每立一議衆咨服之累遷
成均司業后又詔五禮儀物司禮博士有所修革須叔
夏欽明等評處然後以聞進位春官侍郎中宗復位轉
太常少卿為建立廟社使進銀青光祿大夫累封沛郡
公國子祭酒卒贈兗州都督修文館學士諡曰文子綽
紹開元時歷集賢修撰光祿卿遷太常唐興禮文雖具
然制度時時繆缺不倫至顯慶中許敬宗建立籩豆以

多為貴宗廟之數不可踰郊請大祀十二中祀十小祀

八大祀中祀簠簋鉶俎皆一小祀無鉶詔可

按唐會要
敬宗此奏

在永徽二年而新書
以為顯慶未知孰是

開元二十二年

新書于禮器服制
二議疊書二十三年

年知此為二十二年之誤也舊書禮儀志作二十二年
會要作二十三年通鑑併兩事皆繫之二十四年今從
舊書敕合以籩豆之薦未能備物宜詔禮官學士共議以

聞紹請宗廟籩豆每室皆加十二又言酌獻酒爵制度
全小僅無一合執持甚難宜稍大之兵部侍郎張均職
方郎中韋述議曰禮天之所生地之所長苟可薦者莫

不咸在聖人知孝子之情深而物類無限故為之節使
物有品器有數貴賤差降不得踰越左傳曰享以訓恭
儉宴以示慈惠恭儉以行禮慈惠以布政享之與宴猶
且異文祭尊所陳固不同矣且人之嗜好本無憑準燕
私之饌與時遷移故聖人一約以禮屈到嗜芟屈建不
以薦以為不以私欲干國之典今欲取甘旨肥濃皆充
祭用苟踰舊制其何極焉雖籩豆有加豈能備也若以
今之珍饌平生所習求神無方何必師古是簋簠可去

而盤盂栝案當御矣韶護可息而箜篌笙笛應奏矣且自漢以來諸陵皆有寢宮歲時朔望薦以常饌固可盡孝子之心至宗廟正禮宜依典故又按舊制一升曰爵五升曰散禮稱貴者獻以爵賤者獻以散此貴小賤大以示節儉請如故太子賓客崔沔曰祭祀之典肇於太古人所飲食必先嚴獻未有火化則有毛血之薦未有麴蘖則有玄酒之奠施及後王禮物漸備然以神道致敬不敢廢也鉶俎籩豆簠簋罇罍周人時饌也其用通

於燕享賓客周公制禮乃與毛血玄酒同薦鬼神國家
由禮立訓因時制範清廟時享禮饌備進用周制也園
寢上食時膳具陳遵漢法也職貢助祭致遠物也有新
必薦順時令也苑囿之內躬稼所收菑田之時親發所
中莫不薦而後食盡誠敬也若此至矣復何加焉但當
申教有司無或簡怠則濃腴鮮美盡在矣不必加籩豆
之數也至於祭器視物所宜故太羹古饌也盛以甗甗
古器也和羹時饌也盛以鉶鉶時器也亦有古饌而用

時器者故毛血于盤玄酒于尊未有進時饌用古器者古質而今文有所不稱也禮部員外郎楊仲昌戶部郎中楊伯成左衛兵曹參軍劉秩等請如舊便帝乃詔太常擇品味可增者稍加焉緇又請每室加籩豆各六四

時以新果珍羞實之制可又詔獻爵用藥升一升

按食貨志

調鍾律測景合湯藥及冠冕制用小升小兩自餘公私用大升大兩藥升即小升也本或作龠升誤以

合古義二十三年詔書服紀所未通者令禮官學士詳議緇上言外祖父母正尊請進至大功九月姨舅偕親

服宜齊等請進舅至小功五月堂姨舅親舅母古未有服並望加至袒免於是韋述議曰自高祖至玄孫謂之九族由近及遠差其輕重遂為五服傳曰外親之服皆總鄭玄曰異姓正服不過總外祖父母小功以尊加從母小功以名加舅甥外孫中外昆弟皆依本服總麻若以匹敵外祖則祖也舅則伯叔也父母之恩不殊而獨殺于外者有以也禽獸知母而不知父野人則父母等都邑之士則知尊稱大夫學士則知尊祖家無二尊喪

無二斬人之所奉不可二也持重于大宗者降其小宗
為人後者降其父母女子出嫁殺其本宗蓋所存者遠
所抑者私也今若外祖及舅加服一等堂舅及姨列於
本服則中外之制相去幾何且五服有上殺之義出於
祖者服不得過於祖出於曾祖者服不得過曾祖堂姨
舅出於外曾祖若為之服則外曾祖父母外伯叔祖父
母亦宜制服矣外祖至大功則外曾祖小功外高祖總
推而廣之是與本族無異矣且服皆有報則堂甥外曾

孫姪女之子皆當制服矣聖人豈薄其骨肉恩愛哉本
於公者未於私議有所斷不得不然苟可加也亦可減
也先王之制謂之彛倫一紊其叙庸可止乎請依儀禮
喪服為定楊仲昌又言魏徵始議加舅服至小功五月
雖徵賢也而周孔聖也以賢改聖後學何從外祖父母
進至大功則豈無加報於外孫乎外孫而報以大功則
本宗之庶孫用何等耶帝手敕曰議既為姨舅服小功
則舅母不得全降宜服緦堂姨舅宜袒免若謂所服不

得過本而復為外曾祖父母外伯叔父母制服亦何傷
皆親親意也侍中裴耀卿中書令張九齡禮部尚書李
林甫奏言外服無降甥為舅母服舅母亦報之夫之甥
既報則夫之姨舅又當服恐所引益疏詔曰姨舅屬近
以親言之亦姑伯之匹可曰所引疏耶婦人從夫者也
夫於姨舅既服矣從夫而服是謂睦親卿等宜熟計耀
卿等奏言舅母總堂姨舅袒免請準制旨自我為古罷
諸儒議制曰可二十六年詔給每月奏月令一篇每孟

月朔日於宣政側設榻東向置案絀坐讀之諸司官長
悉升殿坐聽歲餘罷高宗上元三年將禘享議者以禮

緯三年禘五年禘公羊家五年再殷祭二家舛互莫能

斷決太學博士史璩

新書作史玄會
要作史玄璩

議曰春秋僖公三

十三年十二月薨文公二年八月丁卯大享於太廟公

羊曰禘也則三年喪畢新君之二年當禘明年當禘羣

廟僖公宣公八年皆有禘則後禘距前禘五年以此定

之則新君之二年禘三年禘已後五年再殷祭則六年

當禘八年當禘昭公十一年齊歸薨十三年喪畢當禘
為平丘之會冬公如晉至十四年禘十五年禘傳曰有
事於武宮是也至十八年禘二十年禘二十三年禘二
十五年禘昭公二十五年有事於襄宮是也則禘後三
年而禘又二年而禘合於禮經議遂定睿宗喪畢禘於
太廟自後三年一禘五年一禘至開元二十七年經五
禘七禘是歲緇奏四月己禘孟冬又禘祭數而黜請以
今年夏禘為大祭之源是後二年而冬禘又三年而夏

禘五年再殷周而復始制從之

按史璣之議依鄭康成禘祫志為說禘後三年

而祫又二年而禘如此則五年之中止有一祫一禘周至開元時不用璣議三年一祫五年一禘各自計年不相通數故二十七年而有五禘七祫也六年睿宗喪畢始祫七年始禘推至二十七年應有五禘八祫是歲夏禘已過而冬祫未行故止有七祫也自此以後又用韋縉之議禘後二年而祫又三年而禘五年再祭與史璣議同然璣則前三而後二縮則前二而後三此為異矣新書備記其事而經省其辭於沿革之故全不分明今願為是正縮終太子少師而疏通之

抗者安石從父兄子弱冠舉明經累官吏部郎中景雲初為永昌令不事威刑而治前令無及者遷右御史臺

中丞邑民詣闕留不聽乃立碑著其惠開元三年自太子左庶子為益州長史授黃門侍郎河曲胡康待賓叛詔持節慰撫抗於武畧非所長稱疾逗留不及賊而返俄代王暉為御史大夫兼按察京畿事左授安州都督累遷刑部尚書分掌吏部選卒抗清儉不治產及終無以葬玄宗聞之特給槨車贈太子少傅諡曰貞

郭震字元振魏州貴鄉人以字顯長七尺美鬚髯少有大志年十六與薛稷趙彥昭同為太學生家嘗送資錢

四十萬會有縵服者叩門自言五世未葬願假以治喪
元振舉與之不問名氏稷等嘆駭十八舉進士為通泉
尉任俠使氣撻去小節嘗盜鑄及掠賣部中口千餘以
餉遺賓客百姓厭苦武后知所為召欲詰責既與語奇
之索所為文章上寶劍篇后覽嘉嘆即授右武衛鎧曹
參軍進奉宸監丞會吐蕃乞和其大將論欽陵請罷四
鎮兵披十姓之地乃以元振充使因覘虜情還上疏曰
臣聞利或生害害亦生利國家所患唯吐蕃與默啞耳

今皆和附是將大利于中國也然圖之不審害且隨之
欽陵欲裂十姓地解四鎮兵此動靜之機不可輕也今
若直過其意恐邊患之起必甚於前宜為計以緩之藉
事以誘之使彼和望勿絕則惡意亦不得頓生且患在
外者十姓四鎮是也患在內者甘涼瓜肅是也闕隴屯
戍向三十年力用困竭脫甘涼有一日警豈堪廣調發
耶善為國者先料內以敵外不貪外以害內然後夷夏
晏安昇平可保欽陵以四鎮近已畏我侵掠此吐蕃之

要然青海吐渾密通蘭鄯易為我患斯亦國家之要今
宜報欽陵曰四鎮本扼諸蕃走集以分其力使不得併
兵東侵今委之則蕃力益強易以擾動必實無東侵意
當以吐渾諸部及青海故地歸於我即俟斤部落亦還
吐蕃如此則足杜欽陵之口而和議未絕也且西邊諸
國欵附歲久論其情義豈可與吐蕃同日語今未知利
害未審情實而遽分裂之亦恐傷諸國意非制御之長
算也后從之又言吐蕃徭戍久矣咸願解和以欽陵

欲裂四鎮專制其國故未歸欵陛下誠能歲發和親使而欽陵常不徙則其下必怨斯亦離間之漸也后然其計後數年吐蕃君臣相猜攜卒誅欽陵而其弟贊婆等來降因詔元振與河源軍大使夫蒙令卿率騎往迎授主客郎中久之突厥吐蕃聯兵寇涼州拜元振涼州都督即遣之初州境輪廣纔四百里虜來必傳城下元振始於南硤口置和戎城北磧置白亭軍制束要路遂拓境千五百里自是州無虜憂又遣甘州刺史李漢通開

屯田盡水陸之利舊涼州粟斛售數千至是歲數登至
匹縑易數十斛積軍糧支數十年牛羊被野治涼五歲
善撫御夷夏畏慕令行禁止道不舉遺河西諸郡置生
祠揭碑頌德神龍中遷左驍衛將軍安西大都護西突
厥酋烏質勒部落盛彊款塞願和元振即其牙帳與計
事會大雨雪元振立不動烏質勒已老數拜伏不勝寒
會罷即死其子娑葛以元振計殺其父謀勒兵襲擊副
使解琬知之勸元振夜遁元振不聽堅卧帳中為不疑

者明日素服往弔道逢娑葛兵虜不意元振來遂不敢
逼揚言迎衛進至其帳修弔贈禮哭甚哀為留數十日
助喪事娑葛感義更遣使獻馬五千駝二百牛羊十餘
萬制詔元振為金山道行軍大總管烏質勒之將闕吸
忠節與娑葛交怨屢相侵而闕吸兵弱不支元振奏請
追闕吸入宿衛徙部落置瓜沙間詔許之闕吸遂行至
播仙城遇經略使周以悌以悌說之曰國家厚秩待君
以部落有兵故也今獨行入朝一羈旅胡人耳何以自

全乃教以重寶賂宰相無入朝請發安西兵導吐蕃以
擊娑葛求阿史那獻為可汗以招十姓請郭虔瓘使拔
汗那蒐其鎧馬以助軍既得復讐部落更存闕嗷然之
即勒兵擊于闐坎城下之因所獲遣人間道齎黃金分
遺宗楚客紀處訥使就其謀元振知之上疏曰往歲吐
蕃犯邊正以求十姓四鎮之地不獲故耳此以國多內
難人畜疲羸恐中國乘其敝故屈志請和非實忘十姓
四鎮也國力殷足勢且必爭今忠節不論國家大計直

欲為吐蕃鄉導四鎮危機恐從此啓吐蕃得志忠節亦當在賊掌股豈能復得事唐也往吐蕃於國無恩力猶欲爭十姓四鎮今若効力樹恩則請分于闐疏勒不知以何理抑之且其國諸蠻及婆羅門方自嫌阻藉令求我助討亦不知以何辭拒之是以古之賢人不願夷狄妄惠非不欲其力懼後求無厭益生中國事也臣愚以為用吐蕃之力不見其便又請阿史那獻者豈非以可汗子孫能招綏十姓乎但獻父元慶叔僕羅兄倭子并

斛瑟羅及懷道等俱可汗子孫也往者徧曾立之欲以
招撫十姓皆不能致尋自破滅何則此屬非有過人之
才恩威不足以動衆况獻又疎遠於其父兄乎若兵力
足取十姓不必要須可汗子孫也又請以郭虔瓘蒐兵
稅馬於拔汗那往虔瓘已嘗與忠節擅入其國臣時在
疏勒不聞得一甲一馬而拔汗那挾忿侵擾南導吐蕃
將倭子以擾四鎮且虔瓘往至拔汗那國四面無助若
履虛邑猶引倭子為蔽况今北有婆葛知虔瓘之西必

引以相援拔汗那倚堅城而抗於內突厥邀伺於外虔
瓘等豈能復如往年得安易之幸哉疏奏不省楚客等
因建遣攝御史中丞馮嘉賓持節安撫闕吸以御史呂
守素處置四鎮以牛師獎為安西副都護代元振領甘
涼兵召吐蕃併力擊娑葛娑葛之使娑臘知楚客謀馳
報之娑葛怒即發兵出安西撥換馬耆疏勒各五千騎
于是闕吸在計舒河與嘉賓會娑葛兵奄至禽闕吸殺
嘉賓又殺呂守素於僻城牛師獎於火燒城遂陷安西

四鎮路絕元振屯疏勒水上未敢動楚客復表周以悌
代元振且以阿史那獻為十姓可汗置軍焉者以取娑
葛娑葛上表請斬楚客且遺元振書自言無仇于唐而
楚客等受闕啜金欲加兵擊滅我豈得坐而待死元振
奏之楚客大怒誣元振有異圖召將罪之元振使子鴻
問道具奏其狀乞留定西土不敢歸京師以悌乃得罪
流白州復以元振代之而赦娑葛睿宗立召為太僕卿
將行安西酋長有觜面哭送者旌節下玉門關去涼州

猶八百里城中爭具壺漿歡迎都督嗟歎以聞景雲二年進同中書門下三品遷吏部尚書封館陶縣男先天元年為朔方軍大總管築豐安定遠城兵得保頓明年以兵部尚書復同中書門下三品玄宗誅太平公主也睿宗御承天門諸宰相走伏外省獨元振總兵扈帝事定宿中書者十四昔乃休進封代國公實封四百戶賜一子官物千段俄又兼御史大夫復為朔方大總管以備突厥未行會玄宗講武驪山帝怒軍容不整引坐轟

下將斬之劉幽求張說跪馬前諫曰元振有大功雖得罪當宥乃赦死流新州開元元年帝思舊功起為饒州司馬怏怏不得志道病卒年五十八十年贈太子少保元振雖少雄邁及貴居處儉約手不置書人莫見其喜愠朝還對親欣欣退就室儼如也距國初仕至宰相而親具者唯元振云

欽定續通志卷二百二十八

欽定四庫全書

欽定續通志卷二百二十九

列傳

唐二十九

姚崇 奕 合

宋璟

姚崇字元之陝州硤石人父善懿

新書名懿字善懿世系表云字善意

貞

觀中為雋州都督崇少倜儻尚氣節長乃好學仕為孝
敬挽郎舉下筆成章授濮州司倉參軍五遷夏官郎中

契丹擾河北兵機填委崇奏決若流武后賢之即拜侍
郎后嘗語左右往周興來俊臣等數治詔獄朝臣相逮
引一切承反朕意其枉更畀近臣臨問皆得其手牒不
寃朕無所疑即可其奏自俊臣等誅遂無反者然則向
論死得無寃耶崇曰自垂拱後被告者類自誣當是時
以告言為功故天下號曰羅織甚於漢之鉤黨雖陛下
使近臣覆訊彼尚不自保敢一搖手以悖酷吏意哉且
被問不承則重罹其慘如張虔勗李安靜等皆是也今

賴天之靈發寤陛下凶豎殲夷朝廷又安今日已後臣
以一門百口保內外官無復反者乞陛下得告牒置弗
推若後反逆有實臣請坐知而不告之罪后悅曰前宰
相務順可陷我為淫刑主聞公之言乃得朕心賜銀千
兩聖歷元年

新書本傳
作三年誤

進同鳳閣鸞臺平章事遷鳳閣

侍郎長安四年以母老請納政詔拜相王府長史歸侍

疾

宰相表四年六月罷為相王府長史舊書亦同新書本傳兼相王府長史在歸養之前未知其審

月

餘復兼夏官尚書同鳳閣鸞臺三品崇建言臣事相王

而夏官本兵臣非惜死恐不益王乃詔改春官張易之
私有請於崇崇不納易之譖於后降司僕卿猶同鳳閣
鸞臺三品出為靈武道大總管張東之等謀誅二張崇
適自屯所還遂參計議以功封梁縣侯實封二百戶后
遷上陽宮中宗率百官起居王公更相慶崇獨流涕東
之等曰今豈涕泣時邪恐公禍由此始崇曰比與討逆
不足以語功然事天后久違舊主而泣亦人臣終節也
由此獲罪甘心焉俄為亳州刺史歷宋常越許四州府

宗立拜兵部尚書同中書門下三品進中書令玄宗在東宮太平公主干政宋王成器等分典閑廐禁兵崇與宋璟建請主就東都出諸王為刺史以壹人心帝以謂主主怒太子懼上疏以崇等褻間王室請加罪貶為申州刺史移徐潞二州遷揚州刺史政條簡肅人為紀德於碑徙同州刺史先天二年玄宗講武新豐故事天子行幸牧守在三百里者得詣行在時帝亦密召崇見之甚歡因咨天下事裒裒不知倦帝曰卿宜遂相朕崇知帝

大度銳於求治乃先設事以堅帝意即陽不謝帝怪之
崇因跪奏臣願以十事聞陛下度不可行臣敢辭帝曰
試為朕言之崇曰垂拱以來以峻法繩下臣願政先仁
恕可乎朝廷覆師青海未有牽復之悔臣願不倖邊功
可乎比來壬佞冒觸憲網皆得以寵自解臣願法行自
近可乎后氏臨朝喉舌之任出閹人之口臣願宦豎不
與政可乎戚里貢獻以自媚于上公卿方鎮寢亦為之
臣願租賦外一絕之可乎外戚貴主更相用事班序荒

雜臣請戚屬不任臺省可乎先朝褻狎大臣虧君臣之
嚴臣願陛下接之以禮可乎燕欽融韋月將以忠被罪
自是諍臣沮折臣願羣臣皆得批逆鱗犯忌諱可乎武
后造福先寺上皇造金仙玉真二觀費鉅百萬臣請絕道
佛營造可乎漢以祿莽閹梁亂天下國家為甚臣願推
此鑒戒為萬代法可乎帝曰朕能行之崇乃頓首謝

謹按

通鑑輯覽

御批姚崇以十事堅上意史書皆為艷稱今就其事數之曰
不幸邊功而薛訥王晙何以屢致敗衄曰官豎不與政事
而高力士楊思勗何以寵任不衰且崇于玄宗之不應懼

而趨出賴高力士為之周旋更私出道上語崇心乃安則崇之所要與玄宗之所謂能行者果安在而崇豈真能不結內侍
者哉 翌日拜兵部尚書同中書門下三品進封梁國公

遷紫微令固辭實封乃停舊食賜新封百戶先是中宗時公主外戚皆奏度僧尼溫戶彊丁因避賦役至是崇建言佛不在外悟之于心行事利益使蒼生安穩是謂佛理烏用姦人以汨真教帝善之詔天下汰僧偽濫萬二千餘人崇嘗於帝前序次郎吏帝仰視殿屋再三言之卒不答崇懼趨出內侍高力士曰陛下新即位宜與

大臣裁可否今崇亟言奈何不一省察帝曰我任崇以政大事吾當與決至用郎吏崇顧不能而重煩我邪會力士宣事至省中為道上語崇乃安由是進賢退不肖

而天下治開元四年

按舊書本紀三年四年皆有崇奏請捕蝗事通鑑亦分載之新書併

入四年蓋承舊傳之誤

山東大蝗民不敢捕崇奏詩云秉彼螽蟴

付畀炎火漢光武詔曰勉順時政勸督農桑去彼螟蟴以及螽蟴此除蝗義也且蝗畏人易驅又田皆有主使自救其地必不憚勤請夜設火坎其旁且焚且瘞乃可

盡乃出御史為捕蝗使分道殺蝗汴州刺史倪若水上
言除天災者當以德昔劉聰除蝗不克而害愈甚拒御
史不應命崇牒報若水曰劉聰偽主德不勝祇今日聖
朝祇不勝德古者良守蝗不入境若其修德可免彼豈
無德致然坐視不救因以無年刺史其謂何若水懼乃
縱捕得蝗十四萬石時議者喧譁帝疑復以問崇對曰
今蝗滿山東日漸蕃息河南河北家無宿藏一不收穫
則流離相踵安危所繫何可不圖縱使除之不盡猶勝

養以成災帝然之盧懷慎曰殺蟲太多恐戾和氣願公思之崇曰昔楚王吞蛭而愈疾叔敖斷蛇以致福今蝗幸可驅若縱之穀且盡如百姓何殺蟲救人禍歸于崇不以譏公也蝗害訖息於是帝方躬萬幾朝夕詢逮它宰相畏帝威決皆謙憚唯獨崇佐裁決故得專任會懷慎卒崇病疴移告凡大政事帝必令源乾曜就咨焉乾曜所奏善帝則曰是必崇畫之有不合則曰胡不問崇乾曜謝其未也乃已帝欲崇自近詔徙寓四方館日遣

問食飲起居尚醫尚食踵道崇以館局華大不敢居帝使語崇曰恨不使卿居禁中此何足辭久之紫微史趙誨受夷人賕當死崇素親倚署奏營減帝不悅時曲赦京師特敕杖誨流嶺南崇惶懼上還宰政引宋璟自代乃以開府儀同三司罷政事帝將幸東都而太廟屋自壞帝問宰相宋璟蘇頲同對曰三年之喪未終不可以行幸壞壓之變天所以示教戒陛下宜停東巡修德以答天譴帝以問崇對曰隋取苻堅故殿以營廟而唐因

欽定四庫全書

部故屯戍斥候士馬儲械無不諳記玄宗初立賓禮大臣故老雅尊遇崇每見便殿必為之興去輒臨軒以送它相莫如也時承權威干政之後綱紀大壞先天末宰相至十七人臺省要職不可數崇常先有司罷冗職修制度擇百官各當其材繇是天子責成于下而權歸于上矣然資權譎始為同州張說以素憾諷趙彥昭劾崇及當國說懼潛詣岐王申款崇它日朝衆趨出崇曳踵為有疾狀帝問損足乎對曰臣心有憂痛不在足問以

故曰岐王陛下愛弟張說輔臣而密乘車出入王家恐
為所誤故憂之於是出說相州魏知古崇所引及同列
稍輕之出攝吏部尚書知東都選知古憾焉時崇二子
在洛通賓客饋遺憑舊請託知古歸悉以聞他日帝召
崇曰卿子才乎皆安在崇揣知帝意曰臣二子分司東
都其為人多欲而寡慎是必嘗以事干魏知古臣未及
問之帝始以崇必為其子隱及聞乃大喜問安從得之
對曰知古臣所薦也臣子必謂其見德而請之帝於是

愛崇不私而薄知古欲斥之崇曰臣子無狀撓陛下法而遂知古外必謂陛下私臣乃止然卒罷為工部尚書崇始名元崇以與突厥叱刺同名武后時以字行至開元世避帝號更以今名

謹按通鑑輯覽

御批崇之改名真所謂不通經義夫開元乃年號非諱名可比且尊號有嗣世遞加者勢必至無名可取又豈直韓愈二名嫌名之譏足以盡之

三子藝昇奕皆至卿刺史

昇少修謹崇欲使習知吏道故自右千牛進至太子舍人皆平遷開元中有事五陵有司以鷹犬從昇曰非禮

也奏罷之請治劇為睢陽太守召授太僕卿後為尚書

右丞子閔

按舊書以閔為聶子新書世系表以
為昇子本傳又以為奕子未知孰是

居右相

牛仙客幕府仙客病甚閔彊使薦奕及盧奐為宰相仙

客妻以聞閔坐死奕貶永陽太守卒曾孫合勗

按世系表以勗

為奐之曾孫合為崇弟
元素之曾孫與本傳異

合元和中進士及第調武功尉善詩世號姚武功者遷

監察御史累轉給事中奉先馮翊二縣民訴牛羊使奪

其田詔美原主簿朱儔覆按猥以田歸使合劾發其私

以地還民歷陝號觀察使終秘書監

勗字斯勤長慶初擢進士第數為使府表辟進監察御史佐鹽鐵使務累遷諫議大夫更湖常二州刺史為宰相李德裕厚善及德裕為令狐綯等譖遂擿索支黨無敢通勞問既居海上家無資病無湯劑勗數餽餉候問不傳時為厚薄終夔王傳

宋璟邢州南和人七世祖弁為元魏吏部尚書璟耿介有大節好學工文辭舉進士中第調上黨尉為監察御

史遷鳳閣舍人居官鯁正武后高其才張易之誣御史大夫魏元忠有不臣語引張說為驗將廷辯說惶遽璟謂說曰名義至重不可陷正人以求苟免緣此受謫芬香多矣若有不測吾且叩閣救將與子偕死說感其言以實對元忠免死璟後遷左臺御史中丞會飛書告張昌宗引相工觀吉凶者璟請窮治后曰昌宗已自言於朕璟曰昌宗事露始自陳且謀反大逆無容首免請正國法后溫言解之璟聲色愈厲曰昌宗分外承恩臣知

言出禍從然義激於心雖死不恨后不懌姚璿舊書及通鑑俱

作楊再思璿傳詔令出璟曰天顏咫尺親奉德音不煩宰相

擅宣王命后不得已遣昌宗詣臺璟庭立而按之事未

畢特詔原之勅昌宗詣璟謝璟不見曰公事公言之若

私見法無私也歎曰不先擊豎子腦裂負此恨矣新舊書俱

云收按易之等通鑑考異云璟止鞠昌宗占相事耳無緣及易之今據改嘗宴朝堂二張列

卿三品璟階六品居下坐易之諂事璟虛位揖曰公第

一人何下坐璟曰才劣品卑卿謂第一何邪是時朝廷

以易之等內寵不名其官呼易之五郎昌宗六郎鄭善果謂璟曰公奈何謂五郎為卿璟曰以官正當為卿君非其家奴何郎之云自是易之等積怨常欲中傷后知之得免嘗詔按獄揚州辭曰此監察御史職也又詔按幽州都督屈突仲翔璟言御史中丞非軍國大事不出使仲翔罪止職今使臣往此必有危臣者既而詔副李嶠使隴蜀璟復言隴右無變臣以中丞副李嶠非朝廷故事終辭易之初冀璟出則劾奏誅之計不得行俄二

張死乃免

按新書云二張伺環家婚禮將遣客刺殺之有告環者環乘庫車舍他所刺不得發此事

舊書不載蓋出御史臺記通鑑考異云若實有其迹環安得不自陳于太后若無其迹則人妄言耳今不取

神龍初為吏部侍郎中宗嘉其直令兼諫議大夫內供

奉仗下與言得失遷黃門侍郎武三思怙寵數有請于

璟璟厲答曰今復子明辟王宜以侯就第安得尚干朝

政獨不見產祿事乎後韋月將告三思亂宮掖三思諷

有司論大逆不道帝詔誅之璟請付獄按罪帝怒璟曰

人言后私三思陛下不問即斬之臣恐有竊議者請按

而後刑帝愈怒璟曰請先誅臣不然終不奉詔帝乃流
月將嶺南會車駕還西京詔璟權檢校并州長史未行
又檢校貝州刺史時河北水歲大饑三思封邑在貝州
專使督其租璟拒不與故為所擠歷杭相二州政清毅
吏下無敢犯者遷洛州長史睿宗立以吏部尚書同中
書門下三品玄宗在東宮兼右庶子先是崔湜鄭愔典
選為戚近干奪至預用二年員闕猶不能給更置比冬
選流品清并璟與侍郎李乂盧從愿澄草之銓總平允

太平公主不利東宮嘗駐輦光範門伺執政以諷之璟
昌言曰太子有大功宗廟社稷主也安得異議乃與姚
崇白奏出公主諸王于外帝不能用貶楚州刺史歷兗
冀魏三州河北按察使進幽州都督以國子祭酒留守
東都遷雍州長史玄宗開元初以雍州為京兆府復為
尹進御史大夫坐小累為睦州刺史按通鑑開元三年
璟坐監朝堂杖輕
貶睦州刺史四年始內召舊書本傳徙廣州都督廣人
為開元初即召拜刑部尚書非也
以竹茅茨屋多火璟教之陶瓦築堵列邸肆越俗始知

棟梁利而無延燒患召拜刑部尚書四年遷吏部兼侍
中帝幸東都次崤谷馳道隘稽擁車騎帝命黜河南尹
李朝隱知頓使王怡等官璟曰陛下富春秋今始巡守
以道不治而罪二臣繇此相飭後有受其敝者帝遽命
捨之璟謝曰陛下向以怒責之以臣言免之是過歸於
上而恩在下姑聽待罪于朝然後詔還其職進退得矣
帝善之累封廣平郡公廣人為璟立遺愛頌璟上言臣
之治不足紀廣人以臣當國假之光寵成彼諂諛欲革

此風望自臣始有詔許停帝嘗命璟與蘇頲制皇子名
與公主號遂差次所封且詔別擇一美稱及佳邑封上
璟奏言七子均養詩人所稱今若同等別封或母寵子
愛恐傷鴈鳩之平臣不敢奉詔帝歎重其賢皇后父王
仁皎卒將葬用昭成皇后父竇孝謏故事墳高五丈一
尺璟與蘇頲請如著令帝已然可明日復詔如孝謏者
璟還詔曰孝謏踰制當時無人極言其失豈可今日復
踵而為之貞觀時嫁長樂公主資送欲倍長公主魏徵

不可太宗欣納而文德皇后降使厚謝韋庶人追王其父擅作鄴陵而禍不旋踵今以后父之尊欲高大其墳何足為難而臣等再三進言者欲成朝廷之政中宮之美爾帝曰朕常欲正身率下況於妻子何敢私之然此乃人所難言公等乃能之即可其奏又遣使賚綵絹四百匹會日食帝素服俟變錄因多所貸遣賑卹災患罷不急之務璟曰臣聞日蝕修德月蝕修刑親君子遠小人止女謁放讒夫此所謂修德也固圍不擾兵甲不瀆官

不苛治軍不輕進此所謂修刑也君子恥言浮於行願
陛下推至誠行之無事空文帝嘉納後以開府儀同三
司罷政事京兆人權梁山謀逆敕河南尹王怡馳傳往
按牢械充滿久未決乃命璟為京兆留守復按其獄璟
至惟罪元謀數人其餘緣梁山詭稱婚集因假貸得罪
及脅從者悉奏原之十三年東巡泰山新書本傳作璟
十二年誤
復為留守帝將發謂曰卿國元老別方歷時宜有嘉謀
以遺朕璟因極言得失手制答曰所進當書之坐右出

入觀省以誠終身賜賚優渥進兼吏部尚書十七年為
尚書右丞相而張說為左丞相源乾曜為太子少傅同
日拜有詔太官設饌太常奏樂會百官尚書省東堂帝
賦三傑詩自寫以賜二十年請致仕許之仍賜全祿退
居洛乘輿東幸璟謁道左詔榮王勞問別遣使賜藥餌
二十五年卒年七十五贈太尉謚文貞璟風度凝遠人
莫涯其量始自廣州入朝帝遣內侍楊思勗驛迓之未
嘗交一言思勗自以將軍貴幸訴之帝帝益嗟重璟為

宰相務清政刑使官人皆任職聖歷後突厥默啜數窺邊九姓拔曳固斬之其首與入蕃使郝靈佺傳詣京師靈佺自謂還必厚見賞璟顧天子方少恐後干寵蹈利者夸威武為國生事故抑之踰年纔授右武衛郎將靈佺恚憤死張嘉貞後為相閱堂按見其危言切議未嘗不失聲歎息六子昇尚渾恕華衡昇太僕少卿尚漢東太守渾與李林甫善歷諫議大夫平原太守御史中丞東京採訪使在平原暴斂求進至重取民一年庸租使

東京時薛稷甥女鄭寡而美渾使河南尉楊朝宗聘而
已納之薦朝宗為赤尉恕以都官郎中為劔南採訪判
官數貪縱不法陰養刺客天寶中渾恕尚並以贓敗渾
流高要恕流海康尚貶臨海長史華衡亦皆坐貪得罪
廣德中渾起為太子諭德物議穢薄之昆弟皆荒飲俳
嬉而衡最險悖廣平之風衰焉

欽定續通志卷二百二十九

欽定四庫全書

欽定續通志卷二百三十

列傳

唐三十

蘇瓌

瓌 幹

說

張說

均 珣

蘇瓌字昌容雍州武功人隋尚書僕射威之曾孫父宣

台州刺史

舊書云父勗按世系表勗乃瓌之伯父舊書誤

瓌擢進士第補恒州

參軍居母喪哀毀加人左庶子張大安表舉孝悌擢豫

王府錄事參軍歷朗歛二州刺史時來俊臣貶州參軍
人懼復用多致書請瓌瓌叱其使曰吾忝州牧高下自
有體能優待小人乎遂不發書俊臣未至追還恨之由
是連外徙不得入久之轉揚州大都督府長史州據部
會多名珍怪產前長史張潛于辯機貲取鉅萬瓌單身
襆被自將徙同州刺史歲旱兵當番上者不能赴瓌奏
宿衛不可闕宜月賜增半糧俾相給足則不闕番又請
却進獻罷營造不省時十道使括天下亡戶初不立籍

人畏搜括卽流入比縣旁州更相廋蔽瓌請罷十道使
專責州縣豫立簿籍天下同日檢正盡一月止歲一括
實以免勞弊武后鑄浮屠立廟塔役無虛歲瓌以為縻
損浩廣又天下僧尼濫偽相半請併寺著僧常員數缺

則補后善其言神龍初入為尚書右丞封懷縣男

舊書云封

進陽縣子進淮陽縣侯與此異

瓌明曉法令多識臺省舊章一朝格式

皆所刪正再遷戶部尚書拜侍中留守京師鄭普思以
妖幻位祕書員外監支黨徧岐隴間相煽誅為亂瓌捕

欽定四庫全書

繫普思窮訊普思妻以左道得幸韋后出入禁中有詔
勿治瓌廷爭帝猶依違司直范獻忠進曰瓌為大臣不
能前誅逆豎而報天子罪大矣臣請先斬瓌於是僕射
魏元忠頓首曰瓌長者用刑不枉普思法當死帝不得
已流普思於儋州餘黨論死累拜尚書右僕射同中書
門下三品進封許國公帝南郊祝欽明建白皇后為亞
獻安樂公主為終獻瓌以為非禮帝前折愧之帝昏懦
不能從時大臣初拜官獻食天子名曰燒尾瓌獨不進

及侍宴宗晉卿嘲之帝默然瓌曰宰相燮和陰陽代天
治物今粒食踴貴百姓不足衛兵至三日不食臣誠不
稱職不敢燒尾帝崩遺詔皇太后臨朝相王以大尉輔
政后詔宰相議禁中宗楚客曰太后臨朝相王有不通
問之嫌不宜輔政瓌正色曰遺制乃先帝意安得輒改
楚客等怒卒削相王輔政事瓌稱疾不朝是月韋氏敗
睿宗即位進左僕射景雲元年老病罷為太子少傅是
冬卒年七十二贈司空荊州大都督諡曰文貞遺令薄

藝布車一乘瓌治州考課常最為宰相陳當世病利甚
多韋溫始為汴州司倉參軍以賦被杖及用事憚瓌正
卒不敢傷開元二年賜其家實封百戶長子頤固辭乃
擢中子又左補闕六年詔與劉幽求酌享睿宗廟廷文
宗太和中錄舊德官其四代孫翔按世系表無翔名瓌六子頤
詵尤顯

頤字廷碩少敏悟一覽千言輒覆誦第進士調烏程尉
武后封嵩高舉賢良方正異等除左司禦率府胄曹參

軍吏部侍郎馬載曰古稱一日千里蘇生是已再遷監察御史長安中詔覆來俊臣等冤獄頤驗發其誣多從洗宥遷給事中修文館學士拜中書舍人時瓌同中書門下三品父子同在禁篋朝廷榮之玄宗平內難書詔填委獨頤在太極後閣口所占授功狀百緒輕重無所差中書令李嶠曰舍人思若涌泉吾所不及遷太常少卿仍知制詔父喪起為工部侍郎辭不拜終制乃就職帝問宰相有自工部侍郎得中書侍郎乎對曰陛下任

賢惟所命何資之計乃詔以頤為中書侍郎帝勞曰方
美官缺輒欲用卿然宰相議無及者朕為卿恨陸象先
歿紫微侍郎未嘗補朕思其人無易卿者頤頓首謝明
日加知制詔給政事食給食自頤始時李乂對掌書命
帝曰前世李嶠蘇味道文壇當時號蘇李今朕得頤及
乂何愧前人哉俄襲封許國公吐蕃盜邊諸將數敗虜
益張秣騎內侵帝欲自將兵討之頤諫曰古稱荒服取
荒忽之義非常奉職貢也故來則拒去則勿逐遠夷左

祗不足以辱天子雖然兵法先聲後實陛下如班親征
之詔而勅虓將謀夫投會濟師則吐蕃不日崩破亦無
待躬致天討也臣謂岐隴凋弊積年若干乘萬騎供億
不涯誠恐徭役內興寇掠外虞斯人不堪一也戎虜之
性驟往倏來敗不耻奔勝不讓成若大軍一臨邊怖震
烏散彼出多方我受其悞二也太上皇聞陛下身對寇
場不能無憂烝烝之思何以自安三也帝不省頤復上
言王者之師有征無戰不當屈萬乘之尊為一日之敵

願稍遷延以須西音會薛訥大破吐蕃俘獲不貲由是
帝止不行時詔立靖陵碑命頊為之詞辭曰前世帝后
不志碑事弗稽古謂之不法若靖陵獨建即祖宗諸陵
皆須追造帝乃止

按舊書及會要並云帝欲建碑因頊
言而止新書云帝不納其言非也

開元四年進同紫微黃門平章事修國史與宋璟同當
國璟剛正多所裁決頊能推其長在帝前敷奏璟有未
及或少屈頊輒助成之故帝未嘗不從二人相得歡甚
璟嘗曰吾與蘇氏父子同為宰相僕射長厚自是國器

若獻可替否事至即斷盡公不顧私則今丞相為過之
八年罷為禮部尚書俄檢校益州大都督長史按察節
度劍南諸州時蜀彫乏人流亡詔頤收劍南山澤鹽鐵
自贍頤尚簡靜重興力役即募戍人輸雇直開井置鑪
量入計出分所贏市穀以廣見糧時前司馬皇甫恂使
蜀檄取庫錢市錦半臂琵琶捍撥玲瓏鞭頤不肯予因
上言遣使銜命先取不急非陛下以山澤贍軍費意或
謂明公在遠巨得忤上意頤曰不然明主不以私愛奪

至公我可以遠近廢忠臣節邪嵩州蠻苴院與吐蕃連謀入寇獲謀者吏請討之頤不聽移書還其謀曰毋得爾苴院羞悔不敢侵邊從封泰山詔頒朝覲壇世咨具文還分主十銓事卒年五十八帝猶視朝起居舍人韋述上疏曰貞觀永徽時大臣薨輒置朝舉哀成終始恩上有旌賢錄舊之德下有生榮死哀之美故禮部尚書頤累葉輔弼奉事軒陛二十餘年令奄忽不還邦人痛嗟惟蓋之舊股肱之戚宜節廢朝明君臣之誼帝曰固

朕意也即日帳次哭洛城南門不朝詔贈右丞相諡曰
文憲葬日帝游咸宜宮將獵聞之半道而還頊性廉儉
奉票悉推散諸弟親族儲無長貲自景龍後與張說以
文章顯稱望略等故時號燕許大手筆帝愛其文曰卿
所為詔令別錄副本署臣某撰朕當留中後遂為故事
其後李德裕著論曰近世詔誥惟頊叙事外自為文章
云

詵字廷言舉賢良方正高第補汾陰尉遷祕書詳正學

士累轉給事中時頊為紫微侍郎固辭帝曰古者內舉
不避親令朕自用詵卿何辭頊之出徐州刺史治有迹

卒贈吏部侍郎

世系表詵
封魏縣男

詵子震

按世系表震為頊之
六世孫蓋旁行之誤

以蔭補千牛十餘歲彊學有成人風頊曰吾家有子累

遷殿中侍御史長安令安祿山陷京師震與尹崔光遠

投開遠門吏棄家出奔會肅宗興師靈武震晝夜馳及

行在帝嘉之拜御史中丞遷文部侍郎廣平王為元師

以震為糧料使二京平封岐陽縣公改河南尹九節度

兵敗相州震與留守崔圓奔襄鄧貶濟王府長史起為絳州刺史進戶部侍郎判度支為泰陵建陵園簿使以勞封岐國公拜太常卿代宗將幸東都復以震為河南尹未行卒贈禮部尚書

幹瓌從父兄也父勗武德中為秦王諮議典籤文學館學士尚南康公主拜駙馬都尉遷魏王泰府司馬博學有美名恭重之勸開館引文學士撰括地志歷吏部侍郎太子左庶子卒幹擢明經授徐王府記室參軍王好

畋每諫止之垂拱中遷魏州刺史河朔饑前刺史苛暴百姓流徙幹檢吏督姦勸課農桑由是流冗盡復以治稱拜右羽林軍將軍遷冬官尚書來俊臣素忌之誣幹與琅邪王冲通書擊獄發憤卒

張說字道濟或字說之其先范陽人後徙洛陽永昌中武后策賢良方正說所對第一后署乙等授太子校書

郎遷左補闕

舊書作
右補闕

久視中后避暑三陽宮沆秋未還

說上疏曰宮距洛城百六十里有伊水之隔崕坂之峻

過夏涉秋水潦方積道壞山險不通轉運河廣無梁咫尺千里扈從兵馬日費資饟連雨彌旬即難周濟陛下太倉武庫並在都邑紅粟利器蘊若山丘奈何去宗廟之上都安山谷之僻處是猶倒持劍戟示人鐔柄臣竊為陛下不取夫禍變之生在人所忽故曰安樂必戒無行所悔此不可一也宮城褊小萬方輻湊填郭溢郭併鋪無所排斥居人蓬宿草次風雨暴至不知庇託孤嫠老病流轉衢巷陛下作人父母將若之何此不可二也

欽定四庫全書

欽定續通志

卷二百三十

九

池亭竒巧蕩誘上心剗密起觀場流漲海俯貫地脉仰
出雲路易山川之氣奪農桑之土延木石運斧斤山谷
連聲春夏不輟勸陛下作此者豈正人邪詩云人亦勞
止迄可小康此不可三也御苑東西二十里外無墻垣
扁禁內有榛叢谿谷猛獸所伏暴慝所憑陛下往往輕
行警蹕不肅歷蒙密乘險巖卒有逸獸狂夫驚犯左右
豈不殆哉易曰思患豫防願為萬姓持重此不可四也
今北有胡寇觀邊南有夷獠騷徼關西小旱耕稼是憂

安東近平輸漕方始臣願及時旋軫深居上京息人以
展農修德以來遠罷不急之役省無用之費天下幸甚
后不省擢鳳閣舍人張易之誣陷魏元忠也援說證其
事說廷對言元忠實無後言乃易之誣構耳忤后旨坐
流欽州中宗立召為兵部員外郎累遷工部兵部二侍
郎以母喪免既暮詔起為黃門侍郎固請終制祈陳哀
到時禮俗衰薄士以奪服為榮而說獨以禮終天下高
之除喪復為兵部兼修文館學士

舊書作弘文館按會
要神龍元年改弘文

館為昭文館二年又改為
修文館此當作修文為是睿宗卽位擢中書侍郎兼雍

州長史譙王重福死東都支黨數百人獄久不決詔說
往按一昔而罪人得乃誅張靈均鄭愔餘誣誤悉原帝
嘉其不枉直不漏惡慰勞之玄宗為太子說與褚元量
侍讀尤見親禮踰年進同中書門下平章事監修國史
景雲二年帝謂侍臣曰術者言五日內有急兵入宮為
我備之左右莫對說進曰此讒人謀動東宮耳陛下若
以太子監國則名分定姦膽破蜚禍塞矣帝悟下制如

說言明年皇太子卽皇帝位太平公主引蕭至忠崔湜等為宰相以說不附已授尚書左丞罷政事為東都留守說知太平等懷逆乃因使以佩刀獻玄宗請先決策帝納之至忠等已誅召為中書令封燕國公實封二百戶始武后末年為潑寒胡戲中宗嘗乘樓縱觀至是因四夷來朝復為之說上疏曰韓宣適魯見周禮而歎孔子會齊數倡優之罪列國如此況天朝乎今四夷請和使者入謁當接以禮樂示以兵威雖曰戎夷不可輕易

焉知無駒支之辯由余之賢哉且乞寒潑胡未聞典故
裸體跳足汨泥揮水盛德何觀焉恐非干羽柔遠搏俎
折衝之道納之自是此戲遂絕素與姚元崇不平罷為
相州刺史河北道按察使坐累徙岳州停實封說旣失
執政意內自懼雅與蘇瓌善時瓌子頊為相因作五君
詠獻頊其一紀瓌也候瓌忌日致之頊覽詩嗚咽未幾
見帝陳說忠謇有勲不宜棄外遂遷荊州長史俄以右
羽林將軍檢校幽州都督入朝以戎服見帝大喜授檢

校并州長史兼天兵軍大使修國史勅齋橐郎軍中論
譔朔方軍大使王賁誅河曲降虜阿布思也九姓同羅
拔野固等皆疑懼說持節從輕騎二十直詣其部宿帳
下召見酋豪慰安之副使李憲以虜難信不宜涉不測
馳狀以諫說報曰吾肉非黃羊不畏其食血非野馬不
畏其刺士當見危致命亦吾効死秋也由是九姓遂安
賁後討蘭池叛胡康待賓詔說相聞經略時党項羌亦
連兵攻銀城說將步騎萬人出合河關掩擊破之追北

至駱駝堰羌胡自相猜夜鬪待賓遁入鐵建山餘衆奔潰說招納党項使復故處副使史獻請盡誅之說不從奏置麟州以安羌衆召拜兵部尚書同中書門下三品讓宋璟陸象先不許明年詔為朔方節度大使親行五城督士馬時慶州方渠降胡康願子反自為可汗掠牧馬西涉河出塞說進討至木槃山禽之俘獲三千餘人乃議徙河曲六州殘胡五萬餘口於唐鄧仙豫間始空河南朔方千里之地以功賜實封三百戶故時邊鎮兵

贏六十萬說以時平無所事請罷二十萬還農天子以
為疑說曰邊兵雖廣諸將但欲自衛及雜使營私爾若
禦敵制勝實不在多且以陛下之明四夷畏威不慮滅
兵而招寇也帝乃從之時衛兵貧弱番休者亡命略盡
說建請一切召募彊壯優其科條不問色役不旬日得
勝兵十三萬分補諸衛以彊京師後所謂曠騎者也帝
自東都將還京因幸并州說見帝曰太原王業所基陛
下巡幸振耀威武以申永恩繇河東入京師有漢武雕

上祠此禮廢闕歷代莫舉願為三農祈穀誠四海之福
帝納其言過祠后土乃還進中書令說又倡封禪議受
詔舉諸儒草儀多所裁正帝召說與禮官學士置酒集
仙殿曰朕今與賢者樂于此當遂為集賢殿乃下制改
麗正書院為集賢殿書院而授說院學士知院事東封
還為尚書右丞相兼中書令詔說撰封禪壇頌刻之泰
山以夸成功初源乾曜不欲封禪說固請乃不相平及
升山執事官當從者說皆引所厚超階入五品從兵唯

加勲而無賜物衆怨其專宇文融先獻策括天下游戶
及籍外剩田置十道勸農使分往檢察說畏其擾數沮
格之至是融請吏部置十銓與蘇頲等分治選事每有
論請皆為說所抑於是銓綜失叙融恨之乃與崔隱甫
李林甫共劾奏說引術士夜解及受贓等狀其言醜慘
帝怒詔乾曜隱甫刑部尚書韋抗卽尚書省鞠之發金
吾兵圍其第說兄左庶子光詣朝堂割耳稱冤帝遣高
力士往視還奏說蓬首垢面席橐於瓦器中食惶懼待

罪帝意憐之力士因言說有功於國帝以為然乃止停
說中書令在集賢院專修國史又乞停右丞相不許然
每軍國大務帝輒訪焉隱甫等恐說復用巧文詆毀素
忿說者又著疾邪篇帝聞因令致仕始為相時帝欲事
吐蕃說密請講和以休息郭塞帝曰朕待王君奭計之
說出告源乾曜曰君奭好兵以求利彼入吾言不用矣
後君奭破吐蕃於青海西說策其且敗因上雋州關羊
於帝以申諷諭

按開元十五年正月王君奭破吐蕃於青海西九月瓜州陷新書獻關羊在底

州未失之前見說先事納忠之
意舊傳叙在瓜州失守後非是
曰使羊能言必將曰關

而不解立有死者所賴至仁無殘量力取勸焉帝識其
意納之賜絲千匹後瓜州失守君奭死十七年復為右
丞相遷左丞相上日勅所司供帳設樂內出醪饌帝為
賦詩以修謁陵儀注功授開府儀同三司十八年十二
月卒年六十四為停元正朝會太師諡曰文貞帝為自
製碑文說敦氣節立然諾喜推藉後進於君臣朋友大
義甚篤帝在東宮所與祕謀密計甚衆後卒為宗臣朝

廷大述作多出其手帝好文辭有所為必使視草善用
人之長多引天下知名士以佐佑王化粉澤典章成一
王法天子尊尚經術開館置學士修太宗之政皆說倡
之為文屬思精壯長於碑誌既謫岳州而詩益悽婉人
謂得江山助云常典集賢圖書之任間雖致仕一歲亦
修史於家始帝欲授說大學士辭曰學士本無大稱中
宗崇寵大臣乃有之臣不敢以為稱固辭乃免中書舍
人陸堅舊書作徐堅誤以學士或非其人而供儼太厚無益國

家議白罷之說聞曰古帝王功成則有奢滿之失或興
池觀或尚聲色今陛下崇儒向道躬自講論詳延豪俊
則麗正乃天子禮樂之司所費細而所益者大陸生之
言蓋未達邪帝知遂薄堅說嘗自為其父碑帝為書其
額曰嗚呼積善之墓說歿後帝使就家錄其文行於世
開元後宰相不以姓著者曰燕公云大歷中詔配享玄
宗廟廷子均均淑

均亦能文自太子通事舍人累遷主爵郎中中書舍人

開元十七年說授左丞相校京官考注均考曰父教子
忠古之善訓王言帝載尤難以任庸以嫌疑而撓紀綱
考上下當時亦不以為私後襲燕國公累遷兵部侍郎
以累貶饒蘇二州刺史久之復為兵部侍郎自以已才
當輔相為李林甫所抑林甫卒倚陳希烈冀得其處既
而楊國忠用事希烈罷而均為刑部尚書坐貶建安
太守還授大理卿居常缺望不平祿山盜國為偽中書
令肅宗反正兄弟皆論死房琯聞之驚曰張氏滅矣乃

見苗晉卿管解之帝亦顧說有舊詔免死流合浦建中
初贈太子少傅子濂事德宗為中書舍人

均尚寧親公主時說居中秉政均為舍人諸父光為銀
青光祿大夫榮盛冠時玄宗眷均厚即禁中置內宅侍
為文章珍賜不可數均供奉翰林而均以此所賜夸均均
曰此婦翁遺婿非天子賜學士也帝嘗幸均內宅顧均
曰希烈辭宰相孰可代者均錯愕未得對帝曰無踰吾
愛壻矣均頓首謝既而不果用均始怨望

新舊書並云
希烈罷相國

忠舉韋見素代之均深歎望按天寶十三載三月祿山還鎮均因國忠之譖貶盧溪司馬八月韋見素乃知政事而云均為此歎望天寶十三載祿山入朝帝欲加同非也今從通鑑改正

平章事國忠曰祿山有軍功然不識字與之恐四夷輕漢乃止及還范陽詔高力士餞漕坡力士歸曰祿山意怏怏若伺知宰相之命不行也帝以語國忠國忠曰必

張洎告之

新舊書並云祿山以破奚契丹功求帶平章事按祿山若有是請而玄宗不與則祿山之

怏怏固宜不待張洎告之而始歎望也通鑑以為出自帝意於情事較合今據改帝怒盡逐其

兄弟以均守建安而均為盧溪郡司馬均自給事中為

宜春郡司馬歲中還均為太常卿帝西狩至咸陽惟韋
見素楊國忠魏方進從帝謂力士曰若計朝臣當孰至
者力士曰張均兄弟世以恩戚貴其當即來房琯有宰
相望而陛下久不用又為祿山所器此不來矣帝曰未
可知也後琯至召見流涕帝撫勞且問均均安在琯曰
臣之西亦嘗過其家將與偕來均曰馬不善馳當繼行
然臣觀之恐不能從陛下矣常嗟悵顧力士曰非若所
料也均遂與希烈皆相祿山均死賊中

欽定續通志卷二百三十